

梅海詩集

共三冊
第一冊

毛叔雲自訂稿

穉
解
詩
集

後學尹端署

民國十六年
重刻於成都

穉解毛公早負文譽與先大父損庵府君有道義骨肉之
雅公車北上出處多偕仁和吳子雋先生觀禮所爲賦蜀兩
生行者也以進士服官山東光緒丙午卒於滕縣任所遺詩
數冊傳寫多訛府君嘗欲爲之印行展轉南北卒卒未果
甲寅冬入都親爲釐次並託朋好任校讐之役多所訂正其
不能臆斷者則姑仍之分爲六卷遺文散佚甚多存者三篇
附詩後代鬻書畫以給印資丙辰十一月始付鉛印期以今
歲二月書成而府君以二月中旬疾作病中往往以亡友遺
詩爲念五月梓人來告刻成府君已不及見矣傷哉伏處
倚廬敬識緣起如此丁巳六月華陽喬曾劬謹記

稚澥詩集跋

毛公叔耘原名席豐登第後改名澥又字稚澥爲諸生時前清南皮相國張之洞光緒初督學四川稱爲蜀中第一人隨中丙子鄉試庚辰庶吉士散館授山東知縣歷任泰安諸城及他各縣政績卓著有呈國史館請立傳文在茲不贅當在京時詩古文詞爲人傳誦名震一時其自定稿稚澥詩集身後由華陽喬樹枏先生排印於北平皆被好者取去流傳於川者不多新繁吳又陵君慇懃毛公高弟辜豫渠續刻不果端以商於前清縣議長辜叔培擬以參議會餘款開雕殊僅得數十圓而議會停止繼由董長安李夢聃各捐百圓由端

在省鳩工藏事併刻楊範九先生春芥山房詩集爾時所印
又爲好者取攜書淨此民國十六七年間事也三十一年縣
長吳公大猷博雅好古詩學尤深公餘慨然捐廉重印以廣
流傳其啓發幽光嘉惠後學意甚厚也端因述其始末以爲
紀念印刷後板存始建鎮圖書館因二公皆生於斯其鄉後
學及毛楊雲初均當負永寶之責云爾

鄉後學尹 端謹跋

穉澥詩集目錄

卷第一

仙井集上

古近體詩一百三十七首

卷第二

仙井集中

古近體詩八十三首

卷第三

仙井集下

古近體詩一百四十八首

卷第四

峽猿集

古近體詩九十四首

卷第五

棧雲集

古近體詩一百二十七首

卷第六

海岱集

古近體詩五十一首

卷第三

曲竹集

古近體詩八十三首

卷第二

曲竹集

古近體詩一百三十五首

卷第一

曲竹集目錄

穉澥詩集卷第一

仁壽毛徵叔雲

仙井集上

古別離

與子結歡好總角相因依歲暮百憂逼念子何當歸執手立
河干河水聲鳴悲北風淒以厲翩翩吹爾衣天矯雙飛龍中
路羽翼乖鴻雁哀南翔臨別尙徘徊况我同心友高舉忽若
遺相憶不在遠咫尺隔山陂愁撫素絲琴絃絕傷中懷索居
易永久過失誰予規

花前醉歌

日欲暮花含愁碧雲四合春悠悠月出正照池西樓綠煙滿
堂不可掃紅燭照人人愈好名花勸酒解笑人明日花殘人
亦老一年見月圓幾回月圓幾回花正開幾回花開逢客來
滄洲白髮不相待醪酒朱顏君一杯

擬古

猗蘭生空谷寂寞含孤芳地遠人不知侵陵凋雪霜眾草更
相訕枯荑蟲蟻傷坐觀蕭艾叢蒼蔚枝葉長蝶來抱恨泣嗟
嗟王者香

東鄰有美女城郭豔窈窕花顏今十三嫁時一何早西鄰有
醜女紡績食不飽漢帝求無鹽十徵不上道世無梁伯鸞孤

棲以終老

園中新種桃結實何離離羣兒不俟熟採摘忘朝飢入口轉
輒盛棄擲拋汙泥桃實豈不甘亦須待其時時來味自美慎
勿傷暮遲

堇肉非不甘餓丐忍不食所以君子明渴死盜泉側神龍戲
滄海變化世莫測有欲即可嘗終爲醢人得

高山石嶄嶄流水聲淅淅美人期不來日暮涼風吹散懷採
芳草憶遠忘行遲淚痕溼羅袖愁君猶未知莫言君不知知
亦來何時人生匪弦望會合多愆期傳書責鴻雁恐被虞人
羈且宜種紅豆盡斫楊柳枝柳枝別時折紅豆長相思

神仙不聞道千歲猶爲夭封禪求赤松安見蓬萊島王母瑤
池宴蛾眉颯秋草金石尙銷鑠焉得長美好志士爭千秋修
身以爲寶顏回三十殤芳名今未老

野墅秋色淡霜風發佳菊喜無蜂蝶狂寒香媚幽獨花遲開
不落桃李隕何速採掇感頽齡東厨酒新熟世事如轉燭百
歲鳥過目但醉莫復問盡此杯中醪

江南鵬嘴船七月可採蓮破曉涉江去鴛鴦沙際眠攀花露
猶滴湖水涼生煙搖曳如花人倒影臨風前采采欲誰贈翹
首望遠天秋鴻南向飛何日還幽燕欲作採蓮曲無人爲扣
舷折得並蒂花憤憤擲水邊日暮打兩槳欲去仍留連惟恐

早霜至紅落不復鮮

故人尺書至僮僕款荆扉倒屣迓來使裘馬皆輕肥故人中
朝貴何意顧寒微開函讀未罷涕下沾我衣上言天子聖輔
佐皆皋夔下言德澤洽萬物生光輝緘淚謝故人努力青雲
期自慚非仲父鮑叔今豈稀

弱冠事豪俠拔劍遠行遊行遊至何所長嘯入幽州金臺千
載空霸氣關河秋獨抱漸離筑來上燕丹樓高歌北風起易
水寒颼颼慨焉想荆卿兒戲非遠謀慷慨樊將軍萬世無匹
傳不成死何恨孤負英雄頭丈夫感知己功名非所籌古人
倘可作執鞭安足羞

岐山化爲谷阿閣成蒿蓬鳳去一千載哀哀吾道窮朝來鷹
隼匿鸞鶴朝於東九州腥穢多悲鳴天地中引領望都邑飄
飄元圃風鳳兮胡爲來矰繳世易逢桐枯竹不實歸哉丹穴
空

轉甕如轉車灌樹不灌花花落不復開樹老成良材種樹種
桃李慎莫栽荆棘荆棘刺傷人桃李飢可食

至人謝聲利澹泊寡所求著書闡道德聾瞽開千秋沒世奚
足云但期躬自修神龜七十鑽身後無遺謀乃遭豫且制使
我淚莫收大化何茫茫天命良悠悠東家與盜跖同盡歸山

邱

晚食以當肉安步以當車富貴常畏人貧賤如我何縣力舉
九鼎罕得全其家斥鷃慕深山山深招網羅魚蝦羨大海海
大蛟龍多

日月轉兩丸迅疾箭不如奔車走駟馬安及過隙駒及時不
行樂負此七尺軀千金買歌舞歡樂無須臾猖狂嗜麴蘖醉
骨生已枯至今伯倫墓何曾依酒壚不見魯丈人至樂常有
餘飲水曲肱臥陶然天地初

驅車古原上遙望黃金臺宮觀鬱嵯峨城闕高崔巍寥天望
不極萬里浮雲來意欲鏟山岳力薄中心哀緬想燕昭王駿
骨收郭隗霸圖寂千載遺蹟空蒿萊

古歌

毛褐可以卒歲糠覈可以療肌一身作客鬱鬱何爲出門山
高高渡河水深深利劍不在手四海無知音

夏夜

風露空山滿天高夜氣沈雲輕多聚散星動乍晴陰螢影石
房亂猿嘯松徑深誰知採薇客抱膝此長吟

紀夢

我從蓬萊游第煮蓬萊石跣足下東海清淺不盈尺恍惚紫
鯨背俯弄日丸赤掬日丸兮隨水轉雞再鳴兮陽谷旦時有
彩霞自天墜海山紅綠眩決然飛起追雲車風泠泠兮倏至

帝所家仰見金彈嵌青天芒吐華橫斜厯落不可數我手摘
之疑摘瓜天體蕩蕩青滑如飴以杖撞門彭鏗響遲瓊扉洞
敞玉爲地下視紅塵金波沸瀛海搖搖秋色寒雪光飛上青
鸞翔

砦居避兵雜詩

古砦高山頂寬平別有天翠崖明紫日赭壁挂紅泉樹本苔
衣厚花間石鏡圓狼烽飛不到擬住問神仙
梯崖三萬級魚貫入天行雲外猶人影風中每鶴聲青溪涵
疊嶂赤燒岷層城所願吞瓊髓騫飛羽翼輕
青壁古苔滑往來雙手捫摩天盤線路鑿石劈山門谷響落